

31 JUL 1997

SEBANYAK 60 PESAWAT RINGAN AKAN SINGGAH DI PERLIS

KANGAR, 31 Julai (Bernama) -- Kira-kira 60 pesawat ringan yang menyertai "The Great Malaysian Air Rally" akan singgah di Perlis Ahad ini dalam perjalanan ke Langkawi.

Menurut kenyataan Urusetia Pelancongan dan Perhubungan Awam Majlis Perbandaran Kangar (MPK), para peserta akan juga mengadakan demonstrasi penerbangan antara pukul 8.30 pagi dan 5 petang.

Menteri Besar, Datuk Seri Shahidan Kassim dijangka hadir menyambut ketibaan para peserta acara itu di landasan terbang Sungai Batu Pahat serta menyaksikan beberapa demonstrasi penerbangan.

Orang ramai dijemput menyaksikan pertunjukan itu yang diadakan secara percuma.

Acara itu yang dilancarkan oleh Perdana Menteri, Datuk Seri Dr Mahathir Mohamad di Sungai Besi, Kuala Lumpur 28 Julai lalu diadakan bersempena Konvensyen dan Pameran Langkawi Fly-In '97.

Konvensyen dan pameran itu akan berlangsung selama empat di pulau bebas cukai itu bermula Isnin ini. -- BERNAMA

AD AKD